



3. januar 2019

Inatsisartut Suleriaasianni § 37 imm. 1 naapertorlugu Naalackersuisunut apeqqutit imaattut matumuuna saqqummiuppakka:

**Naalackersuisunut apeqqutit:**

1. Kikkut suullu kattuffiik Pinngortitaleriffiup suleqatiginikuuai ukiut kingulliit tallimat ingerlanerini?
2. Kikkut aamma taakku suleqatit arlaat Pinngortitaleriffimmut aningaasaleeqataanikuuppat?
3. Pinngortitaleriffik ukiut kingulliit tallimat ingerlanerini nuna allanit aningaasanik qassinik pissarsinikuua?
4. Aningaasaliissutinik tigusaqartoqarsimappat, taava aningaasaliissutit siunertanut sunut tuttusaanikuuppat?
5. Soqutigisaqatigiinnit Pinngortitaleriffik aningaasaliiffigineqarnikuua, nunani allani pisassiissutinut Kalaallit Nunaanni aamma atuuttussanut aalajangeeqataasartunit?
6. Misissuinerit tamaasa eqqarsaatigalugit Pinngortitaleriffik arlaannaannulluunniit attuumassuteqarani suliaminik ingerlatsisinnaava, pisassiissutinut tunngaviusussat pillugit, aamma nunami maani atuuttussanik, Pinngortitaleriffik aningaasanut inatsisip saniatigut tamakkiisumik ilaannakoortumilluunniit allanit aningaasaliiffigineqartarsimappat?
7. Kalaallit Nunaanni pisassiissutissat pillugit innersuussinermut atatillugu Pinngortitaleriffiup arlaannaannulluunniit attuumassuteqannginnissaa qanoq qularnaarneqarsinnaava, Pinngortitaleriffik nunami maani misissuinissanut allaninngaanniit aningaasaliissutinik pissarsinnaappat?
8. Pinngortitaleriffiup arlaannaannulluunniit attuumassuteqannginnera kikkut nalilertarpaat?
9. Arlaannaannulluunniit attuumassuteqannginnissaa qanoq sutigut tamatigut qularnaarneqarsinnaava?
10. Pinngortitaleriffiup arlaannaannulluunniit attuumassuteqannginnissaa qanoq iliorluni pitsaanerpaamik qularnaarneqarsinnaava?

(Inatsisartunut ilaasortaq Steen Lyngø, Demokraatit)

**Tunngavilersuut**

Pinngortitaleriffiup ingerlatsinera Aningaasanut Inatsisikkut aningaasalersorneqarpoq. Taamaakkaluartoq Pinngortitaleriffik pillugu inatsimmi aalajangersarneqarnikuuvoq Pinngortitaleriffik nunatsinni nunanilu allani kattuffinnik suleqatissarsiorsinnaasoq, suleqatigiinneq suleqatinit aningaasalersorneqarsinnaappat.



Tassa imaappoq Pinngortitaleriffik kiffaangissuseqarpoq nunatsinni nunanilu allani soqutigisaqaqatigiinnik suleqateqarnissaminut. Soqutigisaqatigiit taakku pisortanit suliffiutigineqarnermik saniatigut kattuffiusinnaapput namminersortut, pilersinneqarsimasut uumasut aalajangersimasut illersorniarlugit il.il. Kattuffinnik illersuinaqatigiinnik suleqateqarsinnaatitaaneq soqutigisat aporaannerannik kinguneqarluarsinnaavoq, Naalakkersuisunut innersuussuteqartoqassatillugu aamma nunat allamiut illersuinaqatigiiffii uumasut ilaasa illersorneqarnissaat pillugu pilersinneqarsimasut aningaasalersuinikkut suleqatigineqarsinnaasaramata.

Pinngortitaleriffik pillugu inatsimmi piunasaqaateqanngilaq allanik aningaasaliisinnaasunik suleqateqarneq sunik qanorlu tunngaveqarsinnaanersoq pillugu. Tamanna Pinngortitaleriffiup arlaannaannulluunniit attuumassuteqannginnissaanut ernumatitsilersinnaavoq eqqarsaatigalugu Pinngortitaleriffiup Naalakkersuisunut innersuussuteqartarnera.

Taamaattumik soqutigisat aporaatilersinnaanerat pinngitsoortinniarlugi apeqquuserneqarsinnaanngitsunik najoqqutassaqartariaqarpoq Pinngortitaleriffik pisortanit aningaasalersorneqarnermi saniatigut pisassiissutissat pillugit Naalakkersuisunut innersuussisassappat.

Ullut sulliviit qulit naliginnaasut iluanni apeqqutinnut akissutit tiginissaannut qilanaarpunga.